

# S'orientar dapli al pievel

## Pps grischuna: Radunanza da delegads

DA GION NUTEGN STGIER / ANR

■ **Dus giadas gea per las votaziuns naziunalas dals 9 da zercladur, quai han delegadas e delegads da la Partida populara svizra (pps) da noss chantun decidì a Jenaz. Referent è tranter auter stà Toni Brunner, il president svizzer da la pps. Nagin tema èn stadas las tschernas da la regenza 2014.** Bunamain 100 delegads ha attratg la radunanza ed il magnet che ha carmalà tantas dunnas e tants umens è segir stà *Toni Brunner*, il president da la partida tetgala da la pps. Cun esser *Heinz Brand*, il president chantunal da la pps, absent, ha *Andrea Davaz*, il vicepresidente, manà la radunanza. En ses pled da bainvegna ha el ditg che da sperar saja ch'il foss tranter la Val dal Rain grischuna ed il Partenz e las autras regiuns da noss chantun vegnia betg anc pli grond suenter il na tar ils gieus olimpics en il Grischun ed il gea tar l'iniziativa da las abitaziuns secundaras. La pps grischuna saja vinavant pronta da surpigliar responsabladad e da tschertgar soluziuns, ha ditg *Andrea Davaz*. A chaschun dal 2. cussegl grond alternativ dal 1. da zercladur vegnia la pps a preschentar intginas soluziuns quai che pertutga economia e turissem, ha accentuà il vicepresidente da la pps grischuna.

### In cler resultat

Tema central da la radunanza da delegads èn stadas las votaziuns naziunalas dals 9 da zercladur, nua ch'il suveran svizzer decida sche il pievel duaia en l'avegnir eleger il cussegl federal. En tavla star dentant er ina midada da la lescha d'asil. Preschenta da è quella vegnida da deputà *Jan Koch* e

decidì han ils preschents d'acceptar quella midada en la lescha d'asil. Per la tschernada dal cussegl federal entras il pievel ha referì cusseglier naziunal *Toni Brunner* e cunter quella cusseglier naziunal *Martin Candinas*, *Rabius*. *Toni Brunner* ha tranter auter ditg ch'i saja temp ch'il cussegl federal ed insumma la politica s'orientaschian dapli al

pievel che a l'atgna pussanza. Cun acceptar ch'il pievel elegia il cussegl federal posia quel finalmain decider che dunnas ed umens appartegnian a quel gremi e quai saja il dretg da mintga Svizzer, ha ditg *Toni Brunner*. *Martin Candinas* è dentant da l'opiniun che sch'il pievel elegia il cussegl federal lura sajan las aglomeraziuns pli

grondas cler en l'avantatg ed en quel senn perdan las regiuns periferas. Cun ses arguments ha il cusseglier naziunal sursilvan dentant gi pac da dir, ils delegads han sustegnì lur president tetgal e decidì cler cun 78 gea tar 2 na e 5 abstenziuns per la tschernada dal cussegl federal entras il pievel. Nagin tema èn dentant stadas las tscher-

nas da la regenza che han lieu en bun in onn. Adina puspè vegn speculà sche *Heinz Brand* vegnia insumma a candidar per la regenza grischuna u betg. En quella chausa s'exprima la pps grischuna da preschent betg.



Ils dus referents cun il vicepresidente da la pps grischuna: *Martin Candinas*, *Andrea Davaz* e *Toni Brunner* (da san.).

FOTO V. ACCOLA

## Nov directori da partida

A l'ocasiun da las elecziuns cumplementaras ha la radunanza da delegads tschernì *Margrit Bärtsch* e *Mario Cortesi* da Cuira, *Martin Candinas* da Flem e *Reto Rauch* da Sent en il directori da partida. La nova direcziun da la pps grischuna consista d'ina giunta che sa cumpona dal president *Heinz Brand*, dals vicepresidents *Gabriella Binkert-Becchetti*, *Andrea Davaz* e *Walter Hegner*, il responsbel per las medias *Beda Egger*, la secretaria *Valérie Favre*, il schef da fracziun, deputà *Jan Koch*, il respreschentant dals giuven *Jann Andrea Thöny* ed ils respreschentants da las regiuns: *Robert Deplazes* (Surselva), *Christian Durisch* (Plessur), *Gian Luca Giovanoli* (Maloja), *Roman Hug* (Signuradi/Tschintg Vitgs), *Marco Müller* (En), *Elio Paganini* (Puschlav), *Elsbeth Pleisch* (Tavau/Partenz), *Christophe Sambalé* (Valrain), *Roberto Somaini* (Moesa), *Stefan Wehrli* (Plaun), *Werner Wjss* (Alvra).